

## UFỌK ABASI, N̄WAN NDỌ CHRIST

N̄wed Mbon Ephesus 5:1-33.

ỌYỌHỌ UKPEP-N̄KPỌ 403

Eke Mkparawa

**IKỌ IBUOT:** “Ekunyene mbubehe ye mme utom ekim eke miñwumke mfri, edi ekam eda mmọ ewọrọ ke uñwana” (N̄wed Mbon Ephesus 5:11).

### N̄wed Paul

Jesus Christ akanam itiñke ikọ eke mminyeneke udori, ñko mme ikọ emi mbet Esie etiñde edi se inyenede ufọn enyuñ edi akpanikọ. Ke ini Paul, owo-mbet ọkọkwọrọde ikọ ọnọ mme owo, me ekewetde ñwed etop esie ọkọyọhọ ye odudu.

Ke Rome, Paul ama ewet ñwed ọnọ esọk Ufọk Abasi ke Ephesus, ete yak mmọ “esaña ke ima ndien oro ñko edi se eyomde nnyin inam mfin. Enye ewet ekpe ye nnyin ete, yak nnyin itiene Abasi, “nte ndima nditọ”. Kpa nte nditọ ke ikpohidem enyenede mbiet mme ete ye eka mmọ, ntre ke uwem eyen Abasi enyene mbiet Christ ye mme mfri ukpep-ñkpọ Esie. Eti-mbuk Jesus Christ asana, onyuñ ọfọn ama. Ndien ndisime ndutiñ ye mbuburu idighe se “idotde”, inyuñ inyeneke itie ke uwem mme anditiene-Christ. Jesus ama ọdọhọ ete, “Ke usen ikpe mme owo eyenọ mbuk ebaña kpukpru ikpikpu ikọ eke mmọ etiñde” (Matthew 12:36). Ikpikpu ikọ inyeneke ufọn ye udori, mme ikọ emi miwọrọke ñkpọ. Mbuburu ekeme ndisaña ye ndisime ikọ emi adade ọnọ idiok-ñkpọ, me ndimen ñwut ñkpọ emi edehede minyuñ inenke. Emi inyeneke ndidu ke nneme mme anditiene-Christ. Nnyin ikot ke ñwed Ecclesiastes 10:1 ite ke “esisit ebiọ” ke owo emi ekerede ete enyene eti ibuot ye ukpono, etie nte okpo nsuñ ke arañ. Etiñ enọ nnyin ete yak ikusaña “nte mme ndisime, edi isaña nte mbon eti mbuot.”

“Esaña nte nditọ uñwana”. Idiok-ñkpọ edi ekim, ndien Satan edi ọbọñ ekim. Ekpan nnyin ndinyene mbubehe ye mme idiok owo; edi isua inọ mmọ. Mme anie edi ufan fo? Okop inem ndisaña ye mme anie, ndi ye mme anditiene-Christ me ye mme idiok owo? Ediwak ini, ata edu-uwem anditiene-Christ esisasua ọnọ mme idiok owo, okposuk edi enye mitiñke ikọ. Nte ededi edieke Abasi ọnọde nnyin ifet, eyak nnyin ikutre nditiñ ikọ mbaña Jesus. Kudomo ndidip uñwana fo ke “idak abañ”.

### Ndiok Eyo

Ufan 14 etie nte obukpoñ ikot, “Demere”, “daha ke enyọñ”. Nso idi ntak usọp-usọp etop emi? “Koro mme usen ediokde”. Da kpukpru ini eke enyenede nam akpan ñkpọ! Kuyak ifet ebe; sia ini ọmuhọde! “Ekunyuñ ekpa mmin”. Nte ededi, mme usuñ efen edu emi owo ekemedede “ndikpa mmin” onyuñ ọduok Spirit Abasi. Ndusuk owo ekpere “ndikpa mmin” oto ke inemesit uwem emi. Ediwak mkparawa esin idem ke ndikot mme inem ñwed mbuk, mmọ enam ñkpọ “nte eekpa mmin”; ndusuk “ekpa mmin” ke ndise ekebe-ndise; mmọ eken esọñọ eyire ke ndika ufọk uwut-ndise inyuñ ikemeke nditre ndika, ndusuk mkparawa iban eduk mbufa ido edisine-ñkpọ, tutu ido edisine-ñkpọ ererimbot ada ofuri ekikere mmọ. Edi idighe ntre ye anditiene-Christ.

Mmọ emi eduode ekpoñ Abasi eyedọhọ ete: “O, ami ndi akparawa! Ami nnyene ndidu uwem mi nte mmade. Nso idiok ke owo ndika ufọk uwut-ndise ndusuk ini? Nso idiok-ñkpọ odu ke ndise ekebe-ndise? Nte eyenam mi idiok ndiñwọñ eto uñwọñ kiet?”

Ke esen idut, ke ini mkparawa mbon-ekọñ ebighide anyan ini ekpoñ ufọk, ndusuk mkparawa eyedọhọ ete: “Nso idiok odu ke owo ndika ndise mfọn? N̄kọm edi nditie ke isọñ ke akwa aña mbre ye mkparawa eken. Nso ifina edieke midighe idiok ndise ke ewut”? Nso ikọdiok ke esit? Koro ema eka ini kiet, eyedọñ mmọ nditọñ ntak ñka, nnyuñ mfiak ñka. Okposuk edi ekese owo ekerede ete ke idiokke, edi eyeda mmọ esin ke ata idiok-ñkpọ. Nnyin imesikop mme ikọ-ntiense ito mmọ emi, mbemiso mmọ ebọ erinyaña, emi ekesimekde ndika ndise ñkan ndidia udia. Akparawa kiet ama ọnọ ikọ-ntiense ntem: “N̄kenyeneke uyuhọ ke mme ndise: kpukpru ini esikpokpu mi”. Owo efen ama ọdọhọ ete: kpukpru

ñkpọ eke ekekande enye ekuk ema ekabare obubit ke akpa usen emi ikpat esie okodukde ke ufọk uwut-ndise. Ediwak ndise emi ewutde edi se idehede inyuñ ibiatde mme ekikere owo.

Ntak kiet emi ekpesiode ekebe-ndise (TV) efep ke ufọk mme anditiene-Christ edi, koro ikpọ owo ye nditọ-ọwọñ ukem-ukem, etim enyene udọñ ndise se ewutde tutu emi osio akpan ñkpọ emi okpodude ke esit mmọ ofuri-ofuri efep. Ufọk ifañ emi enyenede ekebe-ndise (TV) ke afo edikut itie ubọñ akam? Ekebe-ndise (TV) inyenke itie ke uwem eyen Abasi, koro ediwak ndise eke ewutde ekpep idiok-ñkpọ ye obukpo ido. Ediwak eyeyire ete ke nti ndise edu, edi ọkwọrọ-ikọ Abasi ama ọdọhọ ini kiet ko ete, “Nti udia ekeme ndidu ke itie uduọñ mbio, edi nte afo eyedọñ eyen fo akadia udia do?”

“Esuk idem enọ kiet eken”. Owo ifañ edinyime ndiduok unen mmọ! Ndusuk mmọ enen, edi ekpere ndidi kpukpru owo ekere ete imenen ke ediwak idaha, edi Ọbọñ ọdọdion nnyin kpukpru ini eke iyakde unen nnyin atak okposuk edi ikpekerede ite ke imenen. Ke 1 Peter 5:5, nnyin ikot, “Mbufo mkparawa, esuk idem enọ mbiowo”. Emi abañ mkparawa iren ye iban ndikop uyo mme ete ye mme eka mmọ, mme andikpep ye mme ọkwọrọ-ikọ.

### **Edisana Ñwan-ndọ Christ**

Mme ufañ 20-33 ke mme ọkwọrọ-ikọ esikot ke mme usọrọ udian ndọ, koro mmọ enọ ndise ntọtunọ ebuana emi odude ke ufọt ebe ye ñwan esie. Ndọ esida edikabare ndi kiet edi, ke ini akparawa eren ye akparawa añwan ekpọñde ete, eka ye ufọk ekediana kiet tutu mkpa adianare mmọ. (Nte odude ke Ikọ-Abasi, edisio ke ndọ nnyuñ ñtọñ ntak ndọ efen idighe se enyime, okposuk edi nte mbet idut nnyin ọnọde unyime).

Ndise efen emi nnyin ikemede ndikut ke ukpep-ñkpọ emi edi, ke Jesus Christ ama ọkpọñ ikpanesit Ete Esie edi ke ererimbot man edida ñwan-ndọ ọnọ Idem Esie; oro edi osio Ufọk Abasi Ikpan ke ufọt ererimbot eke atakde. Idibighike Jesus eyedi edida ñwan oro ọnọ Idemesie, ke ini Usọrọ-Ndọ Eyen-erọñ, ata ñkoñ-ñkoñ idaha eyedi utip emi anditiene-Christ edibode. Ana nte nnyin isin ofuri ukeme ndibuana ke utibe ubọñ oro!

Mfin etie nte ufọk Abasi ke ede idap, ke ini Abasi okotde mmọ emi etiede ekpeme ke ñkañ Spirit ndidi Ñwan-ndọ Eyen Esie.

Akwa usọrọ-ndọ ikemeke nditibe ntre, enyene ndida ini nnam ndutim ekem. Akanam afo amaka usọrọ-ndọ onyuñ okut ata afia edisine ọfọñ emi ñwan-ndọ esinede? Nte ama okut uyama iso imam esie nte enye esinde ubọk afat ebe-ndọ esie akama? Kpukpru ñkpọ emi ekpep nnyin ndinam mbeñe-idem ndisobo ye Jesus emi edidide ndida mmọ emi ekebeñede idem mmọ. “Eyak nnyin idara inyuñ idat esit, inyuñ inọ Enye ubọñ, koro ekem ini ndọ Eyen-erọñ, Ñwan Esie otim idem ebeñe Enye” (Eriyarare 19:7). Yak nnyin ikut ite ke imanam ntim-idem nte ekemde; nnyin inyene ndibọ erinyaña emi otode iyip. Nnyin inyene ndineñere mme ñkpọ emi ikanamde iyat mme owo esit. Ndina uduok-mmọñ ke ima ikọbọ erinyaña edi akpan ñkpọ ñko. Ana nte ibọ edinam-asana oto ke Iyip Jesus. Oro edi ọyọhọ utom mfọn iba, emi etọñde ntak eda Iyip Jesus esin ke esit owo. Mfọn emi ada edisana uwem ye ntọtunọ ima ke abañ Abasi ye mme owo esin ke esit owo. “Man akpada enye ọnọ Idem Esie nte ufọk Abasi emi ọyọhọde ye ubọñ, minyuñ inyenke ntọi mme eriñwine mme oruk ñkpọ eke etiede ntre; edi man enye asana onyuñ anana ndo”. Nnyin ikot ke Mme Hebrew 12:14, nte ke edisana-ido miduhe “baba owo kiet idikwe Ọbọñ”.

Ke ima ikọbọ edinam-asana, nnyin inyene ndiyom nnyuñ mbọ uduok-mmọñ Edisana Spirit ye ikañ. Eda utibe enọ emi edomo ye “nsuhọ” aran, me Spirit Abasi, emi mme asian nditọ iban emi ekewọrọde eka ndisobo ye Ọdọ-ndọ ekenyenede. (Kot Matthew 25:1-13). Mme ndisime nditọ iban emi mikenyenke nsuhọ aran, me Spirit Abasi, ema esuhọ ke añwa esien.

Ini kiet efen, andiwet ibuoat ñwed emi ọtọñ ntak ada ekikere nnyin afiak edem aka ufọk anditiene-Christ onyuñ etiñ abañ ima ke ufọt ebe ye ñwan, utọ ebuana emi okponde tutu owo iba ekabare edi kiet. Eda ima emi edomo ye Christ ye ufọk Abasi, enyuñ ekot enye ete “akamba ndibe ñkpọ”.

## **MME MBUME**

- 1 Nso ke etiñ ebaña ndisime ndutiñ ye mbuburu?
- 2 Ufok Abasi emi ananade ntqi mme eriñwine qworq didie?
- 3 Ata ufok Abasi Christ akpaniko ediana didie?
- 4 Nnyin inam didie ifiok ite ke mme usen ediok?
- 5 Qworq didie ke ini edohode ete “ededep ifet”?
- 6 Tiñ ediwak usuñ emi mme owo ekemede “ndikpa mmin”.
- 7 Qworq didie ndisuk idem?
- 8 “Nditq uñwana”, qworq didie?
- 9 Anie edi Ibuot ufok Abasi?
- 10 Ikeme didie ndinyene edisana uwem?